


BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
VLADA UNSKO-SANSKOG KANTONA



BOSNIA AND HERZEGOVINA
FEDERATION OF BOSNIA AND HERZEGOVINA
THE UNA-SANA CANTON
UNA-SANA CANTON GOVERNMENT

Broj: 03-017-701/2017
Dana, 16.03.2017. godine

SKUPŠTINA UNSKO-SANSKOG KANTONA

PREDMET: Izvještaj o radu Kantonalne upravne inspekcije o izvršenim inspekcijskim pregledima u periodu od 01.01. do 31.12.2016. godine dostavlja se;-

Na osnovu člana 148. Poslovnika Skupštine Unsko-sanskog kantona („Službeni glasnik Unsko-sanskog kantona“, broj: 5/04), u prilogu vam dostavljamo Izvještaj o radu Kantonalne upravne inspekcije o izvršenim inspekcijskim pregledima u periodu od 01.01. do 31.12.2016. godine, uz sljedeće:

Obrazloženje

Vlada Unsko-sanskog kantona je na sjednici održanoj dana 16.03.2017. godine, razmatrala i prihvatila Izvještaj o radu Kantonalne upravne inspekcije o izvršenim inspekcijskim pregledima u periodu od 01.01. do 31.12.2016. godine, predlagača Ministarstva pravosuđa i uprave, te vam isti dostavljamo na razmatranje.

PRILOG: - Izvještaj (6x)

PREMIJER KANTONA
mr.sci. Husein Rošić

BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
MINISTARSTVO PRAVOSUĐA I UPRAVE



BOSNIA AND HERZEGOVINA
FEDERATION OF BOSNIA AND HERZEGOVINA
THE UNA-SANA CANTON
MINISTRY OF JUSTICE

KANTONALNA UPRAVNA INSPEKCIJA

Izvještaj o radu kantonalne upravne inspekcije o izvršenim inspekcijskim pregledima u periodu od 01.01. do 31.12.2016.godine

Bihać, mart 2017.godine

SADRŽAJ:

1.	UVOD.....	3
2.	UNUTRAŠNJA ORGANIZACIJA.....	3
3.	MATERIJALNO-TEHNIČKI USLOVI RADA.....	3
4.	NADLEŽNOST.....	4
5.	KONTINUIRANI POSLOVI.....	4
6.	OSTALO, KONSULTACIJE I USMENI ODGOVORI.....	8
7.	EDUKACIJA.....	8
8.	POJAVE I PROBLEMI.....	8
9.	PRIJEDLOG MJERA.....	10

1. UVOD

Zakonom o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“, broj: 35/05), u članu 132., propisana je obaveza kantonalne upravne inspekcije da jednom godišnje podnese pisani izvještaj o izvršenim inspeksijskim pregledima o nađenom stanju, pojavama i problemima i o poduzetim mjerama, sa prijedlogom mjera koje bi trebalo poduzeti za otklanjanje utvrđenog nezakonitog ponašanja.

Kantonalna inspekcija, prema stavu 2. istog člana, izvještaj podnosi Vladi Kantona i Skupštini Kantona.

Cilj izvještaja je ukazati na stanje zatečeno prilikom vršenja inspeksijskog nadzora u organima uprave i upravnim organizacijama na području Unsko-sanskog kantona, pojavama, problemima i poduzetim mjerama u slučaju utvrđenih nedostataka.

2. UNUTRAŠNJA ORGANIZACIJA

Pravilnikom o unutrašnjoj organizaciji Ministarstva pravosuđa i uprave Unsko-sanskog kantona utvrđeno je, da Odsjek za poslove kantonalne upravne inspekcije djeluje u okviru Sektora za upravu, upravljanje ljudskim resursima i poslove kantonalne upravne inspekcije, te da poslove upravne inspekcije obavljaju tri upravna inspektora. Poslove iz djelokruga upravne inspekcije nakon popunjavanja upražnjenog radnog mjesta, u izvještajnom periodu koji obuhvata 2016. godinu, obavljao je jedan upravni inspektor koji je pored poslova upravne inspekcije izvršavao i druge administrativne poslove, te ostale poslove iz djelokruga Ministarstva, po nalogu rukovodioca organa državne službe.

3. MATERIJALNO-TEHNIČKI USLOVI RADA

S obzirom da kantonalni upravni inspektor u vezi vršenja inspeksijskog nadzora ima ovlaštenja da izdaje prekršajne naloge, neophodno je izvršiti povezivanje sa serverom Registra novčanih kazni. U cilju povezivanja, Ministarstvo pravosuđa i uprave je, poštujući propisane procedure, zatražilo usluge Agencije za identifikacione dokumente, evidenciju i razmjenu podataka Bosne i Hercegovine (IDDEAA), putem koje se vrši navedeno povezivanje. S tim u vezi, neophodno je ispuniti određene tehničke preduvjete koje je navela pomenuta Agencija, te se ovo Ministarstvo više puta obraćalo Uredu za zajedničke poslove Vlade Unsko-sanskog kantona zahtjevom za nabavku uređaja „JUNIPER SSG-5“, te za obezbjeđenje internet veze sa statičkom IP adresom. Iako je Ministarstvo zamolilo hitnost u postupanju, do kraja godine neophodni uvjeti za povezivanje sa serverom Registra novčanih kazni nisu ostvareni.

Obzirom da upravna inspekcija vrši nadzor na cijelom području Kantona, potrebno je obezbijediti jedno putničko vozilo, čime bi se smanjio utrošak vremena i povećala efikasnost u radu, te izvršiti popunjavanje barem još jednog od dva upražnjena sistematizirana mjesta upravnih inspektora.

4. NADLEŽNOST

Kantonalna upravna inspekcija organizira se za vršenje inspekcijskog nadzora u kantonalnim, općinskim i gradskim organima uprave i upravnim organizacijama i pravnim licima sa javnim ovlaštenjima i to u odnosu na sljedeća pitanja:

- u općinskim i gradskim organima uprave i upravnim organizacijama vrši inspekcijski nadzor u odnosu na pitanja koja su regulirana federalnim propisima;
- u kantonalnim, općinskim i gradskim organima uprave i upravnim organizacijama vrši inspekcijski nadzor u odnosu na pitanja koja su regulirana kantonalnim zakonom i drugim kantonalnim propisima;
- u pravnim licima sa javnim ovlaštenjima kojima su javna ovlaštenja povjerena kantonalnim zakonom u odnosu na pitanja, koja su regulirana federalnim i kantonalnim propisima.

Organizacija i nadležnost upravne inspekcije, koja je u sastavu Ministarstva pravosuđa i uprave, propisana je odredbama člana 144. Zakona o organizaciji organa uprave u Federaciji Bosne i Hercegovine.

Kantonalni upravni inspektor inspekcijskim nadzorom utvrđuje činjenice koje se odnose na sljedeća pitanja:

1. poštivanje pravila upravnog postupka prilikom rješavanja zahtjeva građana i pravnih lica u prvostepenom i drugostepenom upravnom postupku;
2. primjena propisa o državnoj upravi koji se odnose na organizaciju i način rada organa uprave i upravnih organizacija (Pravilnik o unutrašnjoj organizaciji).
3. primjena propisa o radnim odnosima prilikom ostvarivanja prava državnih službenika i namještenika iz radnog odnosa u organima uprave i upravnim organizacijama, kao i primjena propisa u pogledu ispunjavanja uvjeta školske spreme i drugih uvjeta službenih lica koja rade na poslovima upravnog rješavanja u pravnim licima sa javnim ovlaštenjima;
4. rješavanje upravnih stvari u prvostepenom i drugostepenom upravnom postupku u propisanim rokovima;
5. pravilnost primjene pravila postupka koja su uređena Zakonom o upravnom postupku („Službene novine Federacije Bosne i Hercegovine“ broj: 2/98 i 48/99);
6. način prikupljanja dokaza u upravnom postupku, a posebno dokaza koji prema zakonu treba da se pribavljaju po službenoj dužnosti;
7. način provedbe administrativnog izvršenja;
8. pružanja pravne pomoći građanima i pravnim licima u upravnim postupcima;
9. vođenje propisa o kancelarijskom poslovanju.

5. KONTINUIRANI POSLOVI

Uvidom u djelovodni protokol Ministarstva pravosuđa i uprave, utvrđeno je, da je u izvještajnom periodu, kantonalna upravna inspekcija zaprimila stočetrdeset (140) predstavlki za inspekcijski nadzor fizičkih i pravnih lica, a svi pregledi i radnje iz nadležnosti ove inspekcije izvršeni su po službenoj dužnosti u skladu sa članom 121. Zakona o organizaciji


organa uprave u Federaciji BiH, kojim je propisano da postupak inspeksijskog nadzora pokreće i vodi inspektor po službenoj dužnosti.

Međutim, pored toga, upravni inspektor je u toku izvještajnog perioda sačinio ukupno 431 akt iz svoje nadležnosti.

Tabelarni prikaz kantonalnih i općinskih organa uprave, upravnih organizacija i pravnih lica sa javnim ovlaštenjima u Unsko – sanskom kantonu u pogledu broja podnesenih predstavki od strane građana i pravnih lica, je sljedeći:

<i>Redni broj</i>	<i>Kantonalni i općinski organi uprave, upravne organizacije i pravna lica sa javnim ovlaštenjima na čiji rad je podnesena predstavka u 2016. godini</i>	<i>Broj podnesenih predstavki</i>	<i>Broj predstavki po kojima je inspektor postupio na način propisan Zakonom o organizaciji organa uprave u Federaciji BiH</i>
1.	<i>Grad Bihać</i>	15	15
2.	<i>Općina Bosanska Krupa</i>	6	6
3.	<i>Općina Bosanski Petrovac</i>	5	5
4.	<i>Općina Bužim</i>	20	20
5.	<i>Općina Cazin</i>	13	13
6.	<i>Općina Ključ</i>	3	3
7.	<i>Općina Sanski Most</i>	8	8
8.	<i>Općina Velika Kladuša</i>	22	22
9.	<i>Ministarstvo za građenje, prostorno uređenje i zaštitu okoliša</i>	2	2
10.	<i>Ministarstvo unutrašnjih poslova</i>	5	5
11.	<i>Ministarstvo obrazovanja, nauke, kulture i sporta</i>	1	1
12.	<i>Ministarstvo poljoprivrede, vodoprivrede i šumarstva</i>	4	4
13.	<i>Ministarstvo zdravstva, rada i socijalne politike</i>	4	4
14.	<i>Kantonalna uprava za inspeksijske poslove</i>	10	10
15.	<i>Kantonalna uprava za šumarstvo Bosanski Petrovac</i>	2	2
16.	<i>Poljoprivredni zavod</i>	2	2
17.	<i>Skupština USK</i>	3	3
18.	<i>Ured Vlade USK</i>	2	2
19.	<i>Kantonalni sud u Bihaću</i>	2	2
20.	<i>Općinski sud u Bihaću</i>	1	1
21.	<i>Općinski sud u Bosanskoj Krupi</i>	1	1
22.	<i>Općinski sud u Cazinu</i>	1	1
23.	<i>Općinski sud u Velikoj Kladuši</i>	1	1
24.	<i>Općinsko pravobranilaštvo Velika Kladuša</i>	2	2

25.	Općinsko pravobranilaštvo Bosanska Krupa	1	1
26.	JU Centar za socijalni rad Bosanski Petrovac	2	2
27.	JU Centar za socijalni rad Bihać	2	2
	UKUPNO	140	140 (100,00%)



Na temelju ovih statističkih pokazatelja, a sagledavajući cjelokupnu problematiku upravnog rješavanja vidljivo je, da je u pojedinim općinama Unsko-sanskog kantona najviše predstavnika bilo na rad Općine Velika Kladaša, a čiji pretežni dio se odnosio na nerješavanje upravnih stvari u prvostepenom upravnom postupku u propisanim rokovima, a u skladu sa Zakonom o upravnom postupku ("Službene novine Federacije BiH", br. 2/98 i 48/99), te primjena propisa o radnim odnosima prilikom ostvarivanja prava državnih službenika i namještenika iz radnog odnosa u skladu sa Zakonom o državnim službenicima i namještenicima u organima državne službe Unsko-sanskog kantona ("Službeni glasnik Unsko-sanskog kantona", broj: 5/12).

Kad su u pitanju kantonalni organi uprave, vidljivo je da je najveći broj predstavnika bio na rad Kantonalne uprave za inspeksijske poslove. Najveći broj tih predstavnika se odnosio na nefunkcionisanje urbanističko-građevinskog inspektora čije radno mjesto je bilo upražnjeno početkom 2016.godine, te ne rješavanje upravnih stvari u drugostepenom upravnom postupku u propisanim rokovima.

Neke od predstavnika odnosile su se na prijave nezakonitosti u radu više organa državne službe, tako da je po jednom zahtjevu za inspeksijski nadzor izvršeno više inspeksijskih pregleda kod različitih subjekata nadzora.

Kantonalni upravni inspektor je u izvještajnom periodu izvršio sedamdeset pet (75) inspekcijskih pregleda povodom predstavki fizičkih i pravnih lica, u općinskim i kantonalnim organima uprave, upravnim organizacijama i pravnim licima sa javnim ovlaštenjima, te je:

- u dvadeset osam (28) predmeta donio rješenje kojim je subjektu nadzora naložio upravne mjere propisane članom 125. Zakona o organizaciji organa uprave u Federaciji BiH,
- u četrdeset sedam (47) predmeta nisu utvrđene povrede propisa nad čijom primjenom nadzor vrši upravna inspekcija,

O naprijed navedenim inspekcijskim pregledima obaviješteni su i podnosioci predstavki za vršenje inspekcijskog nadzora u smislu člana 121. Zakona o organizaciji organa uprave u Federaciji BiH.

Nadalje, kantonalni upravni inspektor je u izvještajnom periodu vršeci inspekcijski nadzor obavio i inspekcijske preglede po službenoj dužnosti i to u Kantonalnom sudu u Bihaću, Općinskom sudu u Bihaću, Općinskom sudu u Bosanskoj Krupi, Općinskom sudu u Cazinu i Općinskom sudu u Velikoj Kladuši. Predmet ovih inspekcijskih pregleda bio je nadzor nad pravilnošću primjene propisa o radnim odnosima u organima državne službe odnosno Zakona o državnim službenicima i namještenicima, u pogledu ispunjavanja uvjeta za prestanak radnog odnosa državnih službenika i namještenika ispunjavanjem zakonom propisanih uvjeta. Stim u vezi, a postupajući u skladu s ovlaštenjima iz člana 117. do 125. Zakona o organizaciji organa uprave u Federaciji BiH, kada je u vršenju inspekcijskog nadzora utvrdio da je povrijeđen zakon čije izvršenje nadzire, upravni inspektor je subjektu nadzora naložio poduzimanje odgovarajućih upravnih mjera.

Naime, poslove inspekcijskog nadzora u izvještajnom periodu u svim kantonalnim i općinskim organima uprave, upravnim organizacijama i pravnim licima sa javnim ovlaštenjima obavljao je samo jedan upravni inspektor, a svakako je prioritet morao dati iniciranim inspekcijskim pregledima, jer je Zakonom o organizaciji organa uprave u Federaciji BiH inspektorima određen rok za postupanje po predstavkama.

Nadalje, povodom određenih predstavki koje je zaprimio kantonalni upravni inspektor, od subjekata nadzora zatraženo je očitovanje, te im je ukazano da poduzmu odgovarajuće mjere u cilju rješavanja zahtjeva na koji se predstavka odnosi, kao i da o poduzetim mjerama izvjest Ministarstvo pravosuđa i uprave – upravnu inspekciju. U pojedinim predmetima subjekti nadzora poduzeli su neophodne službene radnje, te završili upravne i druge postupke, a dokaz o istom dostavili na znanje i ovom inspektorima, zbog čega nije bilo osnova da se nalažu upravne i druge mjere.

U dvadeset šest (26) predmeta upravni inspektor je, u skladu sa odredbama člana 65. stav 4. Zakona o upravnom postupku Federacije BiH, zahtjev za inspekcijski nadzor ustupio drugim organima na nadležno postupanje, o čemu su obaviješteni i podnosioci predstavki za vršenje inspekcijskog nadzora.

Osim toga, inspektor je obavezan pratiti provedbu upravnih mjera koje je naložio rješenjem, pa ako utvrdi da se naredene mjere ne provode na način i u roku kako je rješenjem određeno, obavezan je podnijeti zahtjev za pokretanje prekršajnog postupka, kao i preduzeti druge mjere za koje je zakonom ovlašten. U tom smislu, kada je u vršenju inspekcijskog nadzora utvrdio da je povrijeđen zakon čije izvršenje nadzire, upravni inspektor je nalagao

poduzimanje odgovarajućih upravnih mjera za otklanjanje nedostataka, a u slučajevima kada je kontrolnim inspeksijskim pregledom utvrđeno da nedostaci nisu otklonjeni, protiv odgovornih lica u skladu sa Zakonom o prekršajima u Federaciji Bosne i Hercegovine („Službene novine Federacije BiH“, broj: 63/14), podnio je zahtjev za pokretanje prekršajne odgovornosti kod nadležnog suda. Jednako tako, kada je u vršenju inspeksijskog nadzora upravni inspektor utvrdio da su učinjene povrede službene dužnosti od strane državnog službenika, nastale kao rezultat njegove krivice, tada je rukovodiocu organa državne službe podnio zahtjev za pokretanje disciplinske odgovornosti. Pored navedenog, kada je u vršenju inspeksijskog nadzora inspektor utvrdio da je subjekt nadzora postupio suprotno zabrani datoju u rješenju upravnog inspektora, protiv odgovorne osobe podnio je krivičnu prijavu Kantonalnom tužilaštvu Unsko-sanskog kantona.

Upravna inspekcija je u izvještajnom periodu svakodnevno primala stranke i pružala pravnu pomoć građanima i pravnim licima. Pravna pomoć odnosila se prvenstveno na sljedeće oblasti:

- Bespravnu gradnju,
- Radni odnosi državnih službenika i namještenika,
- Rješavanje imovinsko – pravnih odnosa i dr.

6. OSTALO, KONSULTACIJE I USMENI ODGOVORI

Upravnoj inspekciji su se usmeno i telefonskim putem, za pravnu pomoć svakodnevno obraćali zaposleni u kantonalnim, gradskim i općinskim organima uprave i upravnim organizacijama sa područja Unsko-sanskog kantona.

Također, upravni inspektor je u izvještajnom periodu davao stručna mišljenja u pogledu primjene pojedinih odredbi Zakona o državnim službenicima i namještenicima.

Na osnovu Odluke o uspostavi sistema koordinacije Vlade Unsko-sanskog kantona na izradi odgovora na upitnik Evropske komisije, broj: 03-017-313/2016 od 04.11.2016.godine, kantonalni upravni inspektor je imenovan za zamjenika koordinatora ispred Ministarstva pravosuđa i uprave, za Političke kriterije i Poglavlje 3.

7. EDUKACIJA

U 2016. godini, upravni inspektor je učestvovao na jednom seminaru koji je organizovan od strane Direkcije za evropske integracije Vijeća ministara BiH (DEI), na temu: „Pripreme za odgovaranje na Upitnik Evropske Komisije na nivou kantona Federacije BiH“.

Cilj seminara je bio osigurati da se odgovori institucija na pitanja iz Upitnika za politički i ekonomski kriterij, te 33 pregovaračka poglavlja pripremaju na jednoobrazan i konzistentan način, u skladu sa principima razumljivosti, pouzdanosti, sažetosti i cjelovitosti.

8. POJAVE I PROBLEMI

U izvještajnom periodu, upravna inspekcija susrela se sa problemima oko primjene Zakona o državnim službenicima i namještenicima u organima državne službe Unsko-sanskog kantona, koji se ogledaju u sljedećem:

- zapošljavanje u organe državne službe na određeno vrijeme protivno članu 43. istog Zakona,
- nedonošenje rješenja o prestanku radnog odnosa uslijed sticanja uslova za penziju po osnovu godina staža ili starosti i sl.,
- nedonošenje rješenja o odsustvu državnih službenika uslijed imenovanja ili izbora na javnu funkciju,
- postavljenje državnih službenika nakon donošenja pravilnika o unutrašnjoj organizaciji,
- zaključivanje ugovora o djelu za poslove iz nadležnosti organa državne službe,

Također, upravna inspekcija susrela se sa problemima oko primjene Zakona o upravnom postupku, koji se ogledaju u sljedećem:

- poštivanje pravila upravnog postupka prilikom rješavanja zahtjeva građana i pravnih lica u prvostepenom i drugostepenom upravnom postupku;
- primjena propisa o državnoj upravi koji se odnose na organizaciju i način rada organa uprave i upravnih organizacija (pravilnik o unutrašnjoj organizaciji).
- primjena propisa o radnim odnosima prilikom ostvarivanja prava državnih službenika i namještenika iz radnog odnosa u organima uprave i upravnim organizacijama, kao i primjena propisa u pogledu ispunjavanja uvjeta školske spreme i drugih uvjeta službenih lica koja rade na poslovima upravnog rješavanja u pravnim licima sa javnim ovlaštenjima;
- rješavanje upravnih stvari u prvostepenom i drugostepenom upravnom postupku u propisanim rokovima;
- način provedbe administrativnog izvršenja;

Kada bi tokom inspeksijskog nadzora upravni inspektor utvrdio povrede propisa čije izvršenje nadzire, nalagao je upravne mjere radi otklanjanja utvrđenih nepravilnosti.

Nadalje, kantonalni upravni inspektor utvrdio je da u pojedinim općinama na području Unsko-sanskog kantona u službama za imovinsko-pravne poslove i službama prostornog uređenja, komunalnih i stambenih djelatnosti rade jedan, eventualno dva državna službenika pravne struke, uprkos činjenici da se radi o službama koje zasigurno imaju daleko veći broj zaprimljenih zahtjeva u toku godine, nego druge općinske službe. U tom smislu, upravni inspektor bi kroz nalaganje upravnih mjera rukovodiocu organa ukazao na potrebu popunjavanja upražnjenih radnih mjesta u tim službama, te da se kod Agencije za državnu službu Federacije BiH, pokrene odgovarajući postupak kako bi se stvorili kadrovski kapaciteti da se predmeti rješavaju u zakonom propisanim rokovima.

Osim navedenog, u izvještajnom periodu dolazilo je do učestalijih predstavljanja fizičkih i pravnih lica koje se odnose na neizvršenje rješenja općinskih urbanističko-građevinskih inspektora. Kao razlog zbog kojeg se nije pristupalo prinudnom izvršenju rješenja koja su stekla svojstvo izvršnosti, navedeno je nepostojanje stalnih službi za rušenje bespravno izgrađenih građevina ili zaključenih ugovora sa pravnim licima registrovanim za obavljanje takvih djelatnosti, ili pak nedovoljnih sredstava određenih u općinskim budžetima u tu namjenu.

Upravna inspekcija je u izvještajnom periodu ostvarila uspješnu saradnju sa Federalnom upravnom inspekcijom, koja se odnosi prvenstveno na razmjenu mišljenja po određenim pitanjima u upravnom nadzoru. Uspješna saradnja ostvarena je i sa Agencijom za državnu službu Federacije BiH, koja je u nekoliko navrata bila u funkciji podnosioca

predstavke za vršenje inspekcijskog pregleda u području primjene Zakona o državnim službenicima i namještenicima u organima državne službe Unsko-sanskog kantona, zatim sa Kantonalnom upravom za inspekcijske poslove, te Kantonalnim tužilaštvom Unsko-sanskog kantona.


9. PRIJEDLOG MJERA

Stupanjem na snagu Zakona o državnim službenicima i namještenicima, proširena je nadležnost ove inspekcije, budući da je do tog momenta Federalna upravna inspekcija u kantonalnim organima uprave vršila nadzor nad primjenom propisa o radnim odnosima prilikom ostvarivanja prava državnih službenika i namještenika iz radnog odnosa u organima uprave i upravnim organizacijama, kao i primjenom propisa u pogledu ispunjavanja uvjeta školske spreme i drugih uvjeta službenih lica koja rade na poslovima upravnog rješavanja u pravnim licima sa javnim ovlaštenjima. Isto zahtijeva odgovarajuća organizaciona rješenja i obezbjeđenje dovoljnog kadrovskeg potencijala i drugih resursa kako bi upravna inspekcija bila adekvatno opremljena za kvalitetno vršenje poslova iz svoje nadležnosti. Stoga, daljnjim jačanjem kadrovskih kapaciteta za nadzor provedbe propisa iz nadležnosti upravne inspekcije, te stalna edukacija upravnih inspektora osnov je za efikasniju, transparentniju i uslužno orjentisanu javnu upravu.

Analiza dosadašnjih inspekcijskih nadzora ukazuje na evidentan problem kada su u pitanju ljudski potencijali. Ovo ključno pitanje odnosi se na nedostatak kvalifikovanog i adekvatno obučenog osoblja koji bi svoj posao radili stručno i efikasno, pa se uslijed toga upravno rješavanje ne završava u zakonom propisanim rokovima niti u razumnom roku (rješavanje po zahtjevima o upravnim stvarima u upravnom postupku traje i po nekoliko godina). S tim u vezi, organi koji odlučuju u upravnom postupku također bi trebali pojačati unutrašnje sisteme kontrole, uključujući postupke nadziranja vlastite prakse upravnog odlučivanja, kao i poštivanja odluka nadležnih sudova, te stvoriti uslove za popunjavanje radnih mjesta državnih službenika i planiranja budžetskih sredstava u tu svrhu. Pored državnih službenika koji rade na poslovima upravnog rješavanja, poseban naglasak trebao bi biti stavljen na jačanje kadrovskih kapaciteta građevinskih inspektora, kako na nivou općina, posebno onih koje nikako nemaju popunjeno predmetno radno mjesto, tako i na kantonalnom nivou. U cilju bolje efikasnosti organa državne službe predlaže se primjerenije utvrđivanje odgovornosti i nagrađivanja državnih službenika u organima državne službe, kako bi državni službenici učinkovitije obavljali poslove i primali plaću ovisno o ostvarenim rezultatima rada.

Na kraju, ukazujemo na neophodnost poboljšanja materijalno-tehničkih uvjeta rada upravne inspekcije u smislu uspostave samostalnog vozila za potrebe upravne inspekcije, informatičke podrške kako u hardverskom tako i u softverskom smislu, čime bi se obezbjedilo informatičko povezivanje upravne inspekcije sa potrebnim bazama podataka drugih institucija.


Bihać, mart 2017. godine



MINISTAR

dr. sci. Nikola Findrik, dipl. pravnik

BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
VLADA UNSKO-SANSKOG KANTONA



BOSNIA AND HERZEGOVINA
FEDERATION OF BOSNIA AND HERZEGOVINA
THE UNA - SANA CANTON
UNA-SANA CANTON GOVERNMENT

Na osnovu člana 16. a u vezi sa članom 18. stav 4. Zakona o Vladi Unsko-sanskog kantona („Službeni glasnik Unsko-sanskog kantona“, broj: 5/08), na prijedlog Ministarstva pravosuđa i uprave, Vlada Unsko-sanskog kantona na održanoj sjednici dana 16.03.2017. godine, donosi:

ZAKLJUČAK

I

Prihvata se Izvještaj o radu Kantonalne upravne inspekcije o izvršenim inspekcijskim pregledima u periodu od 01.01. do 31.12.2016. godine, s tim da se isti uputi Skupštini Kantona na razmatranje.

II

Ovaj Zaključak stupa na snagu danom donošenja.

Broj: 03-017-701/2017
Bihać, 16.03.2017. godine

PREMIJER KANTONA
mr.sci. Husein Rošić

-prijedlog-

Na osnovu člana 11.n) odjeljak A, poglavlje V Ustava Unsko-sanskog kantona – prečišćeni tekst („Službeni glasnik Unsko-sanskog kantona“, broj: 1/04 i 11/04), člana 95. i 98. stav (2) Poslovnika Skupštine Unsko-sanskog kantona („Službeni glasnik Unsko-sanskog kantona“, broj: 5/04), na prijedlog Vlade Unsko-sanskog kantona, Skupština Unsko-sanskog kantona, na sjednici održanoj dana _____ 2017.godine, donijela je sljedeći

ZAKLJUČAK

I

Prihvata se Izvještaj o radu kantonalne upravne inspekcije o izvršenim inspekcijskim pregledima u periodu od 01.01. do 31.12.2016. godine.

II

Ovaj Zaključak stupa na snagu danom donošenja i objaviće se u „Službenom glasniku Unsko-sanskog kantona“.

Predsjedavajući Skupštine
Unsko-sanskog kantona

Nijaz Hušić, prof.

Broj; _____
Bihać, _____